



UNIVERSITI
TEKNOLOGI
MARA

Akademi
Pengajian Bahasa **Unleashing Potentials**
Shaping the Future

E-ISSN: 2682-7948

Buletin APB

EDISI 11

NOVEMBER 2023

AKADEMI PENGAJIAN BAHASA
UNIVERSITI TEKNOLOGI MARA
CAWANGAN NEGERI SEMBILAN
KAMPUS SEREMBAN





Program Kemasyarakatan FESTBA 2023 Sekolah Kebangsaan Dato' Inas Johol

**SYAHIRAH ALMUDDIN, NORSHIDA HASHIM, SITI NUR DINA MOHD ALI,
NURULNABILAH ABDUL AZIZ, & ANIS SHAHIRA BAZLAN**

UiTM KAMPUS KUALA PILAH

Pada 17 Mei 2023, Akademi Pengajian Bahasa (APB) UiTM Cawangan Negeri Sembilan (UiTMCNS) Kampus Kuala Pilah telah menganjurkan program kemasyarakatan FESTBA 2023 di Sekolah Kebangsaan Dato' Inas, Johol, Negeri Sembilan. Program ini merupakan salah satu aktiviti di bawah program Festival Bahasa yang diadakan pada setiap semester di UiTM Kampus Kuala Pilah. Festival Bahasa merupakan satu program kerjasama antara Persatuan Bahasa Arab dan Eagles English Club dan Akademi Pengajian Bahasa, Kampus Kuala Pilah.

Program ini berjaya dilaksanakan pada semester lepas dan mendapat sambutan yang hangat daripada para mahasiswa dan mahasiswi UiTM Cawangan Negeri Sembilan, Kampus Kuala Pilah. Berikutan kejayaan itu, Akademi Pengajian Bahasa dengan kerjasama Persatuan Bahasa Arab dan Eagles English Club menganjurkan program dengan nafas baharu dengan elemen kemasyarakatan yang dinamakan FESTBA2023. Program ini menyasarkan penglibatan daripada mahasiswa dan mahasiswi UiTM Cawangan Negeri Sembilan, Kampus Kuala Pilah. Namun begitu, program pada kali ini dilaksanakan di peringkat daerah dengan penglibatan murid-murid Tahun 1 hingga Tahun 6 dari Sekolah Kebangsaan Dato' Inas, Johol.

Program FESTBA2023 ini merupakan salah satu inisiatif APB Kampus Kuala Pilah untuk menyumbang kepakaran dan membantu masyarakat setempat di samping memberi pendedahan kepada murid-murid di peringkat sekolah rendah tentang kepentingan penguasaan bahasa yang dapat dipelajari secara santai dan menyeronokkan. Oleh itu, sekolah ini dipilih bagi penganjuran program kemasyarakatan pada kali ini memandangkan status sekolah ini yang merupakan sekolah angkat APB Kampus Kuala Pilah. Oleh itu, kerjasama APB bersama guru-guru dan murid-murid sekolah tersebut bukanlah satu perkara yang asing dan program kerjasama ini dapat diteruskan lagi pada tahun ini.

Pada kali ini, pihak jawantankuasa program ingin memberi fokus kepada aktiviti pembelajaran yang lebih menarik menerusi drama dan nyanyian. Justeru, aktiviti yang dijalankan ini lebih interaktif dan menyeronokkan bersesuaian dengan tahap penguasaan bahasa murid-murid pada peringkat sekolah rendah. Bagi program kemasyarakatan FESTBA 2023 melibatkan sekolah, program yang telah dijalankan ialah Pertandingan Drama Musikal menggunakan tiga bahasa (Bahasa Inggeris, Bahasa Arab dan Bahasa Mandarin) secara dalam kumpulan (LDK). Setiap kumpulan akan dilatih oleh fasilitator yang terdiri daripada pelajar-pelajar UiTM Kampus Kuala Pilah. Program ini merupakan program sehari yang melibatkan dua sesi iaitu sesi pagi sehingga tengahari. Pada sesi petang pula, para pelajar mempersembahkan persembahan masing-masing secara kreatif dan dinilai oleh juri-juri yang terdiri daripada para pensyarah APB Kampus Kuala Pilah bagi memilih kumpulan yang terbaik. Rakaman persembahan yang terbaik telah ditayangkan pada Majlis Penutup FESTBA2023 pada 16 Jun 2023 bertempat di Dewan Kuliah 200, UiTM Kampus Kuala Pilah.

Sejajar dengan matlamat pihak UiTM yang menggalakkan program kemasyarakatan, program ini dianjurkan bagi memperkasakan penguasaan bahasa asing khususnya Bahasa Arab dan Bahasa Mandarin pada peringkat sekolah rendah. Selain itu, program turut meningkatkan keyakinan diri dalam

kalangan pelajar UiTM sebagai fasilitator dan murid sekolah sebagai peserta sekaligus memberi peluang kepada pelajar UiTM Kampus Kuala Pilah untuk melibatkan diri dalam program kemasyarakatan terutamanya yang melibatkan masyarakat setempat. Program ini secara khususnya menyediakan platform bagi jaringan kerjasama antara UiTM, masyarakat setempat dan agensi luar. Berdasarkan maklum balas mengenai program ini, pihak jawatankuasa program telah menerima makluman positif berkenaan program yang telah diadakan. Pihak sekolah sangat meraikan program ini yang sedikit sebanyak dapat memberi motivasi kepada murid-murid yang kurang penguasaan bahasa mereka supaya lebih berusaha dalam pembelajaran mereka. Selain itu, murid-murid turut teruja dengan aktiviti Drama Musikal yang memerlukan mereka bernyanyi dan berlakon bersama rakan-rakan sekumpulan.

Secara tuntasnya, program ini dapat dilaksanakan dengan jayanya hasil kerjasama dan sokongan penuh daripada semua AJK yang terlibat dan kerjasama baik dari pihak Sekolah Kebangsaan Dato' Inas Johol. Program ini telah mencapai objektif yang disasarkan dengan sokongan dan kerjasama penuh yang telah diberikan oleh semua pihak baik secara langsung mahupun tidak langsung. Penguasaan bahasa dalam kalangan pelajar, baik pelajar universiti mahupun murid sekolah, amatlah penting sebagai satu nilai tambah bagi kelangsungan kerjaya mereka pada masa depan. Akhir kata, kami berharap program ini telah memberi impak dan sumbangan kepada perkembangan insaniah mahasiswa dan mahasiswi serta murid-murid sekolah sekaligus memupuk semangat daya saing yang tinggi serta dapat membina keyakinan diri yang lebih tinggi dalam diri mereka.

